

Pregon Fiesta de la Serundaya (por Jorge Enrique Maojo)

CUENTU DEL PREGON DE CENERA

Fay munchos, munchos años, antes que llegaren los moros, antes que la xente falara'n bable, cuando'l mundu yera más grande y los reyes curiaben les vaques y les xanes facien gorgoritos na fonte, había un rey en Cenera que yera perbuenu y persabiu.



Un día de la seronda, el rey, que yera muy vieyín, llamó al so pregoneru y díxoi: "Mira Manín, vas prometeme que en cuantes yo muerra vas dir pol mundu a contayos a tos les presones el Pregon de Cenera. Que to'l mundu lu oiga . Que toos lu deprendan. Que toos sepan que lo que ios dices ye la verdá"

Y pa que non se olvidara, el Rey regalo-i un cuernín de oro que tenía grabau el pregón.

El pregoneru fizo-i la promesa al rey.

Al acabar la seronda, co la primera nevá, el Rey de Cenera morrió.

El pregoneru, dimpués de lloralu díxo: " To que cumplir la promesa que fixe" Asina que en sin salir de debaxo'l horru onde habien enterrao al paisano, llamó a los fíos del Rey pa deciyo el Pregon de Cenera, como había prometío.

Los fijos del rey non yeren como'l so pa y encuantes que oyeron el pregón garraron unu'l hachu, otro la foceta y otro la trienta y dieron-i al probe pregoneru hasta que lu dexaron muertu y fechu cachinos.

Metieronlu'nun sacu y tiraronlu al riu.

Luego garraron el cuernin y escondieronlu debaxo una piedrona. To por que nun querien que naide nunca supieren lo que dicia'l pregon.

El riu, llevo'l sacu agues abaxu y con él diba'l espíritu del probe pregoneru hasta que llegaron al regatu onde enredaben les xanes y los ventolines.

Les xanes, que sabien lo buenu que yera'l rey de Cenera dixeron-i al espíritu del pregoneru: "Nun t'amurnies Manin, nun t'atristayes. Vamos a ayudate agora y pa siempre.

¿Y sabeis que pasó? Pues que d'ende entós hasta hogañu, cuando llega la seronda, to les xanes y los ventolines de Cenera salen y cuerren pe los praos y pel monte ente les





castañales y los pomares. Pinten les fueyes, d'elles de mariellu, d'elles pardes y bermelles. Los ventolinos soplen y faen caer les castañes, les manzanes y les nueces.

Dimpués pasen una nuechi entera amasando bolliquinos d'escanda y faciendo tortos, dulces, frixuelos, fabes y boroña y mientras amasen y cocinen van esconxurándolos toos y asina entra en toos ellos el Pregon de Cenera.

Con les clares del alba, bñense nel agua del regatu y entós les xanes vístense d'aldeanes co la saya, el refaxu y el dengue y pónense pendientes d'azabazhe y collares enriestraos de prata y corales. Les guedeyes, pa que la xente nun vea que son de oru, tápenles co'l pañuelu bien añudau.

Los ventolinos vístense de rapazos co'la chaqueta terciada, calzón cortu, medies de lana, camisa de llinu, faxa de tres vueltes y montera picona.

Entós, entre toos entamen una fiesta y faen fogueres y amaguesten castañes y faen sidra y traen un carrau de panoyes pa'nristrar.

Dimpués, llamen a la xente del mundu co la gaita y el tambor y según van viniendo, en sin querer, con la musica, les castañes, la sidra y to lo demas va entrandoyos dientro'l ánima el Pregon de Cenera.



Co la fiesta y el convite, el alma de la xente ponse feble y hay un vientiquin sele y amorosu que ensancha 'l entendimientu y fai a todos ser meyores.



Luego pa rematala, les xanes los ventolinos y la xente texen xuntos unes riestres apretaes faciendo trences con les fuyes de les panoyes y en cada granu queda pa siempre la voluntá de toos d'esparcir el Pregon de Cenera añu per añu hasta'l final del tiepu y del espaciu.

A mí, como a todos los pregoneros, les xanes de Cenera enseñaronme el cuernin de oro que aquel rey mando grabar y que ellos guarden d'ende 'ntonces co los sus tesoros y esto ye lo que yo vi que traia grabao:

PREGON DEL ESPIRITU DE CENERA

“ A TO LOS HABITANTES DEL MUNDU DE CENERA, QUIEN TENGA ENTENDIMIENTU, ENTIENDA. QUIEN TENGA OIDOS ESCUCHE LA VERDA QUE DIZ EL PREGON

- TOES LES PRESONES SEMOS IGUALES Y NACEMOS LLIBRES*
- NUN HAY AMOS NIN ESCLAVOS. NAIDE MANDA ENRIBA NINGUN*
- EL REY SIRVE A LA XENTE, ASINA QUE LA XENTE YE LA QUE LU ESCOYE Y ESO NUN SE HEREDA.*
- LA TIERRA NUN YE DE NAIDE Y TOOS SOMOS DE LA TIERRA*
- EL AMOR EXISTE Y YE GRANDE ASGALLA, Y AUNQUE NON LO SEPAMOS TA TODU ENTERU DIENTRO DE CADA UN.*
- NUN SEAIS FATOS Y REPARTILU PEL MUNDU EMPECIPIANDO HOY CO LOS QUE TENEIS AL LLAU.*
- ESPARCEI EL PREGON DE CENERA A TOOS*

YO EL REY DE CENERA DIXE.